

欽定剿平粵匪方略

欽定勦平粵匪方略卷二百三十六

庚申年

閏三月十六日

庚戌

和春奏言賊匪圍攻金壇壘

經副將劉成元等擊敗該逆於閏三月初三日

焚巢而遁金壇城外已無賊蹤先是臣以該逆

既竄金壇勢必謀犯句容阻我餉道因派副將

梁克勳帶勇一千名前往駐紮閏三月初三日

梁克勳甫抵句容縣城卽見有官兵旗號山西

南來者疑是後隊踵至未及盤問該逆蠶擁直
進立即喊殺兵民猝不及防由北門退出城遂
失陷查句容爲大營糧餉所必經且又接壤丹
陽鎮江並可旁窺常州實爲扼要之地茲已續
派副將張威邦帶兵三千名由溧化鎮一帶相
機前進何桂清亦派已革總兵蕭知音副將向
奎等分帶兵勇馳赴丹陽鎮江會同剿守其廣

德之賊經總兵熊天喜由四安帶兵進剿紮營於浪宕橋將撲營之賊擊退三月二十八日我軍四路進攻該逆離城二三里列隊迎拒熊天喜等左右兜擊截其回城之路該逆紛紛奔逃熊天喜卽督蔡致貴等分布雲梯直上砍倒守城賊匪數人餘逆驚潰我軍魚貫畢登其時已革總兵米興朝由東庭湖督兵抄襲經歷凌蔚

臣等馬步各隊由南門直入熊天喜所部入自東門會同搜剿城內匿匪悉數殲除當將廣德州城克復惟是建平踞匪仍有回犯之虞甯國旌德未復山路仍可竄入浙西臣因賊匪竄犯常屬腹地又旁陷句容繞山大營之後不得不先其所急飭令熊天喜帶同劉成元羅熙賢各軍馳赴丹陽鎮江聽調所有防守廣德事宜卽

飭米興朝所部二千數百人駐守張玉良現已
馳至常州所有常鎮諸軍均歸總統以一事權
現在援師漸次調集各路鎮將如能先復句容
進解溧水之圍大局可望立轉臣惟有竭力圖
維兼籌並顧斷不敢稍事大意所有克復廣德
及金壇解圍出力員弁等容俟查明再行奏請
恩施陣亡之把總王得魁王得應請

訪部從優議卹其未能察出假冒官兵以致句容失陷
之副將梁克勳應請

旨卽行革職留營隨剿以觀後效奏入

上諭內閣曰據和春奏克復廣德州詳細情形卽著嚴
飭米興朝駐守該城以次克復建平等縣毋令蔓延
所有此次出力及金壇解圍出力之員弁兵勇著和
春會同何桂清查明保奏陣亡之把總王得魁王得

均著交部從優議卹副將梁克勳經和春派往防守
句容逆匪假冒官兵旗號蠡擁直進該副將未能察
出以致句容失陷殊堪痛恨梁克勳著卽革職仍留
軍營責令隨剿並著和春等飭令張威邦等帶兵扼
剿迅圖克復

十八日 壬子 何桂清奏言句容縣城於閏三月初

三日被匪闖入初七日賊蹤已至溇化鎮大營

後路喫重白兔尤爲要衝亟需重兵扼剿熊天
喜帶勇三千名已抵丹陽兵力尙單當於金壇
防兵內抽撥副將劉成元所帶馬步隊一千名
馳赴丹陽隨同熊天喜進紮白兔相機會剿惟
探聞白兔附近地方多被賊擾居民遷徙一空
該鎮等營盤能否卽日紮定尙未可必又據已
革總兵米興朝報稱初二日由廣德進兵克復

建平而提督周天受函稱甯防賊勢臨張危在
旦夕蕪湖東壩重門洞開逆黨源源而來一無
抵禦溧陽尙無兵進剿該處聚匪時至宜興楊
巷一帶焚擄總兵劉季三防守縣城因兵單未
能出擊金壇之賊亦時有回竄之勢各處無日
不以添兵爲請不得已於丹陽防兵內酌撥蕭
知音所帶之勇一千名馳往金壇會同參將艾

得勝等協力守禦此外皆無以應之常州爲蘇
杭鎖鑰總兵馬德昭兵勇一千一百名參將羅
熙賢兵勇二千名於離城三十餘里下弋橋等
處擇要扼紮以防溧陽宜興金壇各路之匪城
內僅提督張玉良所統千人遇有緩急不敷分
布蘇州無錫處處空虛惟恃常州一城以爲保
障臣體察事勢惟有於大營東路厚集兵力設

法堵剿先攻句容次第規復溧陽東壩辦理方
有把握已囑張玉良派員馳赴大營與和春張
國樸密商機宜斟酌妥辦奏入報

二十一日乙卯王有齡奏言臣督帶親軍於閏三

月十一日馳抵杭州探得昌化之賊意欲分股
內竄業由瑞昌分飭都司李龍等帶勇前赴餘

杭富陽等處扼要堵遏惟是逆蹤飄忽慣走山
僻捷徑杭州新復人心未固且存城兵勇不過
五千有餘近又分起調遣益覺城大兵單設該
逆由間道窺伺難保不繞出我兵之後臣現會
商瑞昌就現有兵力將城守事宜趕爲布置並
飭遊擊王振聲統帶親軍在附城松毛場地方
屯紮以扼餘杭等處八省要路仍隨時探明何

聞

路緊要或堵或剿再行相機調度奏入報

二十三日丁巳袁甲三奏言臣派援滁全之副都

統烏勒興阿等馬步各軍到滁後與李世忠會
商機宜當以茅草嶺腰鋪賊壘林立議定進兵
之策閏三月初一日副將向聰得等分三路前
進直趨茅草嶺賊營而令遊擊倪文藻等帶勇

攔截腰鋪應援之路我軍行抵茅草嶺該逆列陣迎拒鏖戰逾時我軍奮力衝突賊勢不支登時散亂李世忠指揮各隊分路搶營火箭噴筒絡繹施放該逆驚惶失措棄營西奔營外之賊立腳不住均各潰逃我軍乘勝殺賊一千餘名生擒四百餘名該處連營四座並營內所儲子藥糧米一併奪獲當我軍與賊交戰時腰鋪之

賊聞信來援倪文藻等伏於附近讓過頭隊攔腰截擊該逆首尾不能相顧均各回竄我軍緊追踏毀賊營二座賊仍踞營十座死守不出追茅草嶺得勝之軍馳至四面合圍該逆連夜棄營奪路狂奔我軍分路追剿計又斃賊七八百名生擒二百餘名逆酋陳玉城圍困全椒專恃此二處賊營阻遏要隘斷絕糧道今均爲我軍

攻破糧道漸通向聰得及李世忠等卽在腰鋪駐紮一面分隊進至全椒城下初三日參將蔣立功等各帶馬步直薄賊營該逆擁衆出戰相持時許烏勒興阿派兵抄擊朱元興一見我軍旗幟亦由城帶隊衝出兩面夾攻該逆死傷枕藉紛紛撤退我軍偪至河邊該逆泅水而逃淹斃無數東門賊營五座一律平毀城圍立解而

隔河賊營仍復對峙初四至初九日疊次過河
衝撲均經我軍擊退殲斃甚多該逆旋即遁去
河北一帶均已肅清惟全椒上通和含下達浦
六且近接江干賊衆往來勢難斷絕此時雖已
敗竄難保不復圖窺伺臣已飛飭李世忠督同
朱元興等多運米糧軍火以定軍心現值攻逼
定遠喫緊之時應卽飭調烏勒興阿迅速帶隊

回營仍留向聽得一軍暫駐滁全察看情形再
令酌量回營此次賊圍全椒幾及一月該文武
員弁兵勇等竭力守禦得保危城可否由臣查
明出力人員併案酌保出自

鴻慈奏入

上諭內閣曰官兵進至全椒直趨茅草嶺殺賊一千餘
名生擒四百餘名立將賊營攻奪移軍進拔腰鋪逆

壘斃匪七八百名生擒二百餘名進至全椒城下內
外夾攻該逆紛紛撤退賊營五座一律踏平城圍立
解河北一帶均已肅清此次賊圍全椒幾及一月該
文武員弁等竭力攻守得保危城著該大臣查明尤
爲出力人員併案酌保以示鼓勵

同日何桂清奏言據甯國道府來稟甯郡南陵
之賊俱已擊退皖南軍情較鬆該逆大股一由

東壩徑趨金陵一由溧陽圖竄常郡又探報句
容逆匪悉向溧化鎮而去江北皖南之匪羣趨
金陵併力犯我長圍和春欲調張玉良馬德昭
羅熙賢等軍均回大營助剿復飭熊天喜劉成
元二軍改由丹陽鎮江前進並於鎮江防兵內
抽調副將馬占葵所部千人併歸熊天喜統帶
馳往石埠橋紮營以顧餉道而馬占葵所帶兵

勇因天長六合之逆意圖出竄業經李若珠調
回揚州探聞自句容至溧化鎮賊壘甚多秣陵
關之兵亦被圍困石埠橋龍潭下蜀街各處徧
地賊蹤伏思蘇常與大營情同休戚何敢稍存
膜視惟歸臣調遣之兵分布三四百里之地均
係力保危城其未能進取溧陽實爲句容牽掣
之故大營勁旅十倍常州蘇常紳民方冀添兵

前來以資攻勦若將張玉良等軍概行調回則
常州無一得力之兵賊氛環徧聲息易通溧陽
宜荆之匪設有一路來犯何以禦之現聞張國
樑移紮高橋門十二日親身督戰獲有勝仗賊
勢漸卻石埠橋距大營三四十里餉道所關自
已就近派兵扼守該逆於西路一經受創卽恐
由句容回竄丹陽所有熊天喜劉成元二軍仍

應由丹陽進紮白兔相機攻剿臣惟有會同張
玉良就現有兵力黽勉支持隨時與和春等妥
商辦理以期漸圖補救奏入

上命軍機大臣傳諭和春張國樑何桂清曰現在金陵
長圍攻剿正當喫緊之際自當兼顧大營後路以通
餉道並嚴防賊匪抄襲惟蘇常爲江南大局所關亦
應力籌堵剿以遏賊匪分竄之路現當賊氛環逼常

州兵力實形單薄所有援常諸軍應如何調撥策應以圖萬全不致顧此失彼著和春張國樑何桂清等和衷商推不可偏重一處致誤事機金陵後路固宜嚴防而常州亦不可稍有失事該將軍等務當力圖兼顧相機籌辦以保全東南大局

同日周天受奏言臣以甯防四面喫緊南陵一城與郡城互爲犄角必須竭力顧全乃嚴飭駐

紮清弋江東岸之副將劉仁福力圖進攻俾駐防南陵之陳大富嚴守待援不以孤軍失恃三月二十二至二十五等日劉仁福疊次帶隊進攻踏毀逆卡多座陳大富於二十一二二十四等日督隊出戰斬擒無數該逆復糾大股連日晝夜環攻均經衆軍擊退二十九日陳大富分兵四路進攻自率親軍策應署南陵縣知縣廉能

帶團助戰諸軍銜枚疾進北路之軍先破賊壘
乘勝合戰南路東路之賊相繼潰奔其進攻分
界山之軍橫衝截殺遂將城外賊壘一律鏟除
焚溺斬擒無算追殺二十餘里南陵之圍遂解
閏三月初一日逆首李遠繼復以大隊圍攻清
弋江東岸保樂岡營盤別隊抄襲寒亭後路參
將馮開得等盡力分禦衆寡不敵賊遂竄踞市

中臣於初二日親督總兵李嘉萬等率隊直趨
寒亭適賊攻保樂岡正急遂催隊前進戰於寒
亭劉仁福遙見援軍大至亦分隊出營接仗臣
揮軍夾擊立將寒亭踞賊勦除劉仁福亦將攻
營之賊擊退先是己革副將熊廷芳經臣派令
帶勇千名扼守紅楊樹詎賊竄寒亭時另股隔
河窺犯紅楊樹守備陶泰和千總蔡斗有部勇

先潰熊廷芳督戰不力賊遂乘之查紅楊樹旣失瞬息可犯灣沚尤慮其進竄竹塘不得不暫調副將吳再升等灣黃防軍回駐廟埠竹塘等處以保郡比要衝詎初三日夜官軍營壘未堅賊卽竄至竹塘遊擊蔣錫光與都司張倫均不能力禦而退幸吳再升扼住廟埠初四日臣親督各軍進勦竹塘該逆見官軍擁至退過大埂

踞橋爲險次日我軍分三路進攻賊勢大潰追殺十餘里當卽攻復竹塘以李嘉萬等軍駐守臣仍回邵城初五至初十日賊由東門渡等處疊次進犯均經擊退此時廣德建平雖已克復尙無重兵扼守浙東之賊近又竄踞昌化縣出嶺卽係甯國縣境涇縣仍爲賊踞南陵未可解防甯郡四面仍屬戒嚴兵力不敷分布臣惟有

隨時相機防剿以仰副

聖主軫念南疆之至意至南陵將士力戰兩月有餘克
解重圍肅清縣境可否將出力之文武員弁兵
勇紳團擇尤彙保出自

鴻施其守禦不力各員相應請

旨分別懲處奏入

上諭內閣曰此次南陵將士剿守兩月有餘卒解重圍

實屬著有微勞所有在事出力之文武員弁兵勇紳
團著准其會同張芾擇尤保奏其守禦不力之遊擊
蔣錫光都司張倫守備陶泰和千總蔡斗有均著卽
行革職已革副將熊廷芳著發往軍臺效力贖罪以
上各員均仍暫留軍營責令殺賊自效參將馮開得
不能力守寒亭本有應得之咎姑念次日隨同解圍
尚知奮勉著拔去花翎以示薄懲

二十五日己未瑞昌奏言臣以衢嚴之賊日徧日

近分派各軍力遏竄省要路布置甫定接到探報該逆由分水竄踞昌化本月初七日復分股一回竄分水一竄入於潛之應渚埠次日復由馬嶺轉入新城分水交界之處又有另股竄分邑之小口埠池龍等處經兵勇民團分路堵截該逆大股併入分邑李定太一軍由桐移紮新

城段光清亦由嚴移紮桐廬分路攻剿該逆盤踞分邑四路竄擾俱經李定太派兵迎擊退回縣城該鎮現在畢浦及分新交界之吳家礪等處分紮營壘與民團聯絡扼堵至富陽餘杭爲入省要路亦已分派兵勇水陸嚴防奈兵力不敷分布前飛咨徽郡分兵馳援並飭蕭翰慶所帶楚勇馳回堵剿日內可至新城其留辦衢防

集賢堂 卷之三
饒廷選一軍因江西股匪逼近信豐入浙進皖
均未可定勢難移撤會勦並聞常開等處尚有
餘逆亦將由遂竄杭防勦愈形棘手此時江南
大營緊急所有調回援兵不能赴浙惟有俟徽
郡援軍到來力圖攻勦奏入

上命軍機大臣傳諭瑞昌王有齡曰賊匪聚集分水並
分股擾及於潛新城等處勢甚蔓延使非急籌掃蕩

勢將不可收拾李定太係債軍之將且聞其所部兵
勇到處滋擾恐難得力饒廷選因衢防緊急復難兼
顧所有省城西南一路勦捕事宜應如何添調官兵
及派委得力將弁統率以期迅殲羣醜卽著瑞昌王
有齡會商妥辦張玉良未能再赴浙江所有該省軍
務統歸瑞昌王有齡調度前據慶端奏福建所派援
兵三千業經飛飭繼興等迅速前進計已可抵浙境

著該將軍等卽與張芾所派蕭翰慶等管帶之勇一併催提以資攻剿各軍未到之先仍就現有兵力妥籌防剿毋稍疏失

瑞昌又奏言查廣德州城克復後米興朝趕將西北兩路要隘分布營壘杜賊回竄一面抽派勇丁一千餘名於本月初一日進規建平初二日行抵距城三十餘里探知逆衆已將外竄各

隊鼓行而前署廣德州知州邵啟元亦帶廣建
民團繼進我軍於城外樹林內徧插旗幟作爲
疑兵並令民團隱伏各隘已革參將方國淮等
進攻東南兩門轟塌垛口十餘處官軍緣城而
上砍殺賊匪多名各隊卽由東南兩門衝入沿
街截殺邵啟元亦帶團丁四面齊進旋將民團
分布四城方國淮等卽追出北門二十里外敗

賊於分水龍王廟逆屍枕藉查廣德建平爲浙
江西路門戶現在兩城已先後克復浙西情形
稍鬆堪以仰慰

聖廬奏八報

聞

二十六日庚申和春奏言自賊匪竄陷句容後遂

於本月初七日由溇化鎮至馬鞍山各鄉放火

城內首逆知外援已到卽在七橋壘營前添築
三壘攻我濠牆經張國樑督兵擊敗初九至十
一日援逆由南路沙子岡直至秣陵關連營數
十座而高橋門及小水關大營後路亦添賊壘
城逆復於上方安德等門分路出撲張國樑督
飭將士迎擊斬首千餘級十二日賊又分十數
路來攻探聞賊會陳玉城李秀城李侍賢楊輔

青等統率各路悍賊十餘萬必欲力破長牆而後已張國樑與王浚分督諸將至清波門陳家橋一帶出擊自朝至暮斃賊不下二三千該逆見東南無懈可擊於十四日由上河毛公渡等處搭造浮橋數道攻我外牆城逆從內應之是日風雨交作將士徹夜不能收隊十五日風雨愈大張國樑派隊馳赴西路救援詎料行至上

河毛公渡一帶見總兵黃靖等營盤被圍數重
援軍不能衝入黃靖馬登富吳天爵營中火起
據衝出兵勇僉稱該三員均已力竭陣亡張國
樑遂斷上方橋欲固守東北半壁

臣

與張國樑

許乃釗相商亦惟有從小水關以東設法守禦
立即傳知各營一律嚴守無如三更以後小水
關附近南北各營亦皆火發

臣

與張國樑許乃

釗王浚卽帶本營兵將分投赴援火光中接仗
逾時而小水關之營亦卽起火臣復與張國樑
王浚在馬巷口截殺後軍祇得退守鎮江以圖
再舉伏念洪逆崛起金陵已經八載各路賊黨
皆有所恃以爲聲援到處竄起計惟有先拔本
根則枝葉自萎用是竭力圖維定南北合圍之
計冀絕其生路又知鋌走困鬪勢所必至自正

月初九日扼斷九狀洲後卽於西南添築外牆以禦援逆不料浙西潰決良將勁兵先後調援者不下一萬三千人而淳壩宜荆防兵又調去一萬有奇旋因淳壩溧陽失守蘇常大震援浙之師又不得不調赴常郡先其所急迨溧水句容先後失陷秣陵被圍大營亦卽四面受敵矣雖添募新勇以守長牆而訓練未成心志不固

致有此失就此時情形而論惟有將句容溧陽
次第克復再出溇壩與皖南會師先清徽甯以
至池太然後各路之師會擣金陵其勢雖緩尙
無後患臣和春督師無狀功敗垂成臣張國樑
有統率諸軍之責不能防患未然臣許乃釗共
事圖維亦復無能補救實屬惶恐無地惟有請
旨將臣等從重治罪以爲僨事者戒其陣亡之總兵黃

靖副將馬登富守備吳天爵應請

飭部從優議卹

和春又奏言丹陽界常鎮兩府之間地處適中
最爲扼要茲探賊騎已至白兔寶堰等處焚掠
距丹陽均不過數十里之遙彼處防兵僅有總
兵熊天喜及副將劉成元參將林定海所部六
千數百名尙屬不敷堵剿臣與許乃釗督同王

浚酌帶兵勇四千餘名於二十一日拔隊前往
相機剿辦張國樑暫留鎮江收集兵勇俟布置
妥當亦卽統兵前進會商攻取奏入

上命軍機大臣傳諭和春張國樑何桂清曰此次逆賊
分路圍攻金陵大營衆軍退守鎮江功敗垂成殊深
憤懣現在和春等擬先將句容溧陽次第克復再出
洧壩與皖南合兵先清徽甯以至池太然後各路之

師會擣金陵先芟枝葉再拔本根目下情形亦祇可
如此辦理卽著和春等會合籌商激勵將士分兵攻
拔各城維持全局力贖前愆此次援賊雖衆何以一
隅挫失全局渙散況大營處處火起非奸細潛伏卽
自行擾亂所奏情形殊不明晰著和春等據實覆奏
江北六合等處踞匪未除原恃張國樑控馭今張國
樑退扼鎮江賊匪已跨江聯爲一氣天長未克揚州

一帶殊屬可虞李若珠前經僨軍獲咎斷難勝此重任著卽撤去幫辦飭令仍回大營隨同張國樑剿賊其揚州督兵大員著和春張國樑另選得力提鎮前往駐紮以資鎮守再王夢齡已補授江甯藩司江北各屬錢糧均歸江甯藩司經理催提解充軍餉王夢齡應令其駐紮江北何處地方俾得就近經理以專責成並應否令管江北糧臺之處均著何桂清酌定

具奏

上又命軍機大臣傳諭袁甲三翁同書曰此次逆首陳
玉城等乘江南調兵援浙大營空虛之際糾合賊黨
與金陵城內之賊兩路衝突勢極臨張和春等退守
鎮江惟江北未暇兼顧該逆必至與六合等處股匪
聯絡著袁甲三等督飭兵勇防其竄越清江一路現
無重兵扼守亦屬空虛並飭派赴天長之副將黃開

榜等嚴密防範袁甲三等仍激勵官軍速克定遠以杜逆援

上又命軍機大臣傳諭官文曾國藩胡林翼曰逆賊乘大營調出各軍援浙之際分路夾攻和春等營盤官軍力不能支遂於十五日退守鎮江該將軍等圍攻數載不能出奇制勝至有今日實堪痛恨惟現在溧陽等城尙未收復祇可准其先圖規復各城以固蘇

常門戶再圖進取其江北六合等處踞匪此時和春等難於兼顧深恐袁甲三翁同書未能遏其兇燄北竄可虞楚軍已定大舉入皖太湖潛山業經克復自應亟籌進取都興阿病已痊愈著卽督帶馬步各隊四五千名馳赴皖北或由舒桐或由霍六進兵與袁甲三等各軍聯絡聲勢駐紮江北進攻六合浦口天長等處以杜該逆北擾惟口糧軍火此時江皖斷難

文應必須寬爲籌備卽著官文曾國藩胡林翼將如何進取之處悉心籌酌傳旨令都興阿迅速帶兵馳往

上又命軍機大臣傳諭楊載福曰前因句容溧水相繼失守金陵外援之兵過多大營頗覺空虛當經諭令楊載福會同江南水師總兵吳全美等聯絡聲勢以杜外竄本日據和春奏句容等處逆匪與金陵城賊

圍攻大營官軍力不能支退守鎮江此次逆首陳玉城等糾眾救援金陵現在長圍已失其勢直逼江北著楊載福會同吳全美李德麟等各帶師船沿江巡梭如有匪船北渡卽行痛剿以分逆勢

上諭內閣曰金陵援賊竄陷句容以後與城賊聯絡夾攻官軍營盤經張國樑督同將士晝夜鏖戰殺賊極多而逆黨愈來愈眾官軍勢難支持遂於本月十五

日退扼鎮江和春奉命督師已閱數載上年奏請添募壯勇增築長圍方謂克復城池已有把握乃因循日久不能出奇制勝以致逆燄復張實難辭咎姑念此次失事究因浙江告警派出援師過多以致未能抵禦尙屬可原和春著卽革職並拔去雙眼花翎仍暫行署理江甯將軍留於江南督兵以觀後效幫辦軍務張國樑著拔去花翎革職留任許乃釗著以四

品京堂降補以示薄懲仍著激勸將士奮勉圖功力
贖前愆陣亡總兵黃靖副將馬登富守備吳天爵均
著從優議卹其餘陣亡及不知下落各員並著和春
等查明具奏

二十九日

癸亥

瑞昌王有齡奏言廣德建平雖相

繼克復而東壩溧陽等處均未肅清賊蹤不遠
時以回竄爲慮總兵熊天喜所部兵勇已調往

丹陽一路堵剿僅有已革總兵米興朝一軍駐
守廣德副將王夢麟袁國祥兩隊又折回徽防
存兵不及二千建平城中並無一兵空虛尤甚
臣王有齡抵任後卽以廣德爲江浙門戶宜有
重兵駐守適聞南陵解圍徽甯防務稍鬆曾函
致周天受請調副將陳大富等軍赴廣助防又
蕭翰慶一軍前經張芾截留臣復與函商調駐

廣德均未覆到本月十八日接米興朝咨稱東
壩定埠之賊分股竄至北山頭五昌廟等處距
建平十餘里蔡村一帶亦聚賊數千並聞溧陽
之賊已竄至六家埠均有回竄建平廣德之意
現在杭嚴各屬處處須防省垣城守事宜亦不
得不豫爲布置兵力實已不敷分機臣等籌商
再四抽調振威等軍一千五百名交楊金榜統

帶卽日馳往廣德相機勦辦復飛咨張芾周天
受轉飭蕭翰慶陳大富等迅速起程或取道甯
國或徑赴廣德合力迎勦杜賊回竄之路而能
否剋期應調起在賊前尙難豫必當此東西兩
面警報紛來實有應接不暇之勢臣等惟有相
機調度以期力固危疆

同日張芾奏言自太平旌德相繼不守以浙省

軍情萬緊不能剋期進取不得已撤石埭之師
馳援浙省致青陽股匪乘閒竄踞石埭徧地賊
蹤將成燎原之勢適蕭翰慶一軍行抵祁門當
經奏請暫留徽防藉資攻剿隨即檄行總兵江
長貴由績溪進攻旌德飭知府蘇式敬等出鴛
嶺進攻太平飭蕭翰慶率同義勇章志俊山羊
棧嶺扼紮太石交界處所相機會剿閏三月十

一日蘇式敬等敗賊於麻村埂十二日進偪五馬坊將附城賊卡踰毀斬馘頗多次日蘇式敬等督軍由觀瞻嶺進取時蕭翰慶所派營官吳修攷等已由甘棠分隊踵至會合兜剿城中內應同時舉發內外夾擊我軍乘勢奪門直入賊衆猝不及防悉由北門奔竄蘇式敬等揮令各隊分路掩襲斃賊不計其數太平縣城當時克

復江長貴督隊進圖旌德先後敗賊於白沙嶺將軍廟等處各團聞風奮起連日斬獲頗衆江長貴率親軍直薄城下該逆仍負隅死拒我軍分左右翼齊進該逆率百餘騎直前衝撲步賊二千餘衆分路包抄江長貴催兵疾進痛加剿洗該逆紛紛潰奔時都司黃占超等先率馬隊直抵南門江國林等亦將小東門圍裏敗匪不

敢入城繞由北門遁竄江長貴督令將士乘勢
進取遊擊黃朝升等已首先攻破東門黃占超
江國林亦由小東南門斬關而入城賊登時潰
亂卽由北門敗走遂將旌德縣城克復所有此
次尤爲出力各員相應開列請

旨給予獎勵

張芾又奏言自太平旌德克復後臣檄令江長

貫由旌德進攻涇縣以通徽甯之路蕭翰慶派
令章志俊督隊進攻石埭頗有斬馘該逆於十
四日夜間出東門撲營章志俊飭所部分路迎
勦密派唐仁連等由西路越城夾擊時蕭翰慶
與蘇式敬等督兵踵至各軍更番疊進賊勢漸
卻驟見西南火起唐仁連等已率衆登城我軍
乘勝掩襲賊衆方欲回奔入城而城中股匪經

唐仁連等衝擊由東門逃竄彼此自相殘殺官軍復內外夾攻斃賊不可勝算餘匪竄往青陽遂於十五日克復石埭縣城臣以太平旌德石埭三城先後克復皖南軍情復振宜乘此聲勢規取池州與水師互相聯絡不但內防鞏固且北岸攻取安慶各軍亦可遙爲聲援江長貴現已督師進紮三溪蘇式敬等亦由樵嶺等處分

路馳發周天受計日亦必派隊來會三路進兵
務期速將涇縣克復蕭翰慶所帶訓字營一軍
現准官文調赴豫省飭由黃州繞道進發必須
溯江而上臣愚以爲由石埭折回建德東流出
江以退步爲山路逆賊從而生心必將復逞不
若乘勝進取池州攻克後卽由池州出江以進
步爲山路水陸便可聯爲一氣現已分別咨行

如能就此廓清江界是皖南一大轉機也至道員蕭翰慶調度得宜義勇韋志俊自投誠後屢立戰功應請

旨量予獎勵署石埭縣知縣婁森集團隨同克復應請從寬免議責令籌辦善後以輯地方均奏入

上命軍機大臣傳諭瑞昌王有齡曰蕭翰慶一軍前經徽防截留助剿本日據張芾奏官軍連日攻克太平

旌德石埭三城擬令會合各軍乘勢規取池州已諭
張芾等俟攻克後卽飭令蕭翰慶迅赴廣德合兵助
勦並諭張芾周天受於徽甯各軍先行酌量撥調一
併馳赴廣德防守杜賊回竄之路仍著瑞昌王有齡
飛催福建援浙之兵迅速前進此項兵勇到浙亦可
分布各處現在金陵大營爲賊撲擾退守鎮江浙江
杭嚴各屬又處處籌防廣德建平尤不可再有疏虞

致多牽掣瑞昌王有齡仍當就現有兵力督飭帶兵
各員相機合勦力固藩籬

上又命軍機大臣傳諭張芾周天受曰據瑞昌等奏稱
東壩溧陽之賊分股竄出均有回擾廣德建平之意
現在金陵大營退守鎮江蘇常正當喫緊廣德爲江
浙門戶設被逆賊再行竄踞全局又將震動前張芾
派出援浙之副將王夢麟等兩隊已經調回現在旌

太石埭等縣相繼克復軍情稍鬆著卽派撥得力官
軍前往會同米興朝協守瑞昌等商調之副將陳大
富等各軍並著周天受酌量抽撥前赴廣德助剿勿
稍遲誤至蕭翰慶一軍據張芾奏飭令乘勝規取池
州辦理正當得手之際恐未能再行他調俟克復池
州後再令取道前往廣德與浙兵合力剿擊杜賊回
竄之路卽知照官文毋庸調往豫省

上諭內閣曰知府蘇式敬等會同道員蕭翰慶等軍夾
攻太平縣城當於閏三月十三日克復江長貴一軍
直薄旌德亦於是日克復勦辦尙屬妥速所有江長
貴失守所轄地方處分著加恩免其置議知府蘇式
敬著免補知府以道員簡用副將余永椿著俟補缺
後以總兵用遊擊黃朝升著免補本班以參將補用
都司黃占超江國林均著免補本班以遊擊補用其

餘在事出力文武各員著查明覈實保奏署太平縣知縣楊仁雖失守縣城惟整頓團防尙得民心此次受傷甚重著卽革職免其治罪署旌德縣知縣李焜接仗受傷隨同克復功過尙足相抵著革職留任以觀後效

上又諭內閣曰此次皖南各軍於三日之內克復旌德太平及石埭三城勦辦尙爲得手著張芾督飭各軍

乘勝進攻毋留餘孽道員蕭翰慶著賞加鹽運使銜
義勇章志俊自投誠以後屢立戰功著以都司補用
並賞戴花翎其餘在事出力員弁著准其擇尤保奏
署石埭縣知縣婁森集團隨同克復著加恩從寬免
議仍責令籌辦善後事宜以綏地方

王有齡又奏言浙省帶兵需員查有現在曾國
藩軍營之道員李元度係遇有浙江道員缺出

請

旨簡放之員仰懇

飭下曾國藩卽令該員迅速來浙以資臂助奏入

上諭內閣曰記名浙江道員李元度現在曾國藩軍營
著該侍郎卽飭前赴浙江交王有齡差委

張芾又奏言查總兵普承堯一軍現駐下隅阪
去建德之西南四十餘里中隔峻嶺雖可扼彭

澤湖口一路而於建德縣城仍難保其無虞賊
如上犯亦可由建德之東北如馬田洋湖陂葛
公鎮金家村埠頭灣等處長驅直入於江西之
鄱陽浮梁徽州之祁門均有鞭長莫及之患且
亦可竄擾彭湖是以五六千衆偏守一隅未能
顧全江皖大局如以該鎮一軍移紮馬田或洋
湖陂擇要紮營深溝高壘遮蔽其間西可與東

流水師遙爲聲援東可與石埭陸軍互相策應
不獨爲規復池州地步卽江西之鄱浮徽州之
祁黟防兵皆在其後亦可以隨時抽調不致爲
賊所牽掣臣已咨江西撫臣轉飭該總兵移營
扼紮以資堵剿奏入

上從之

三十日甲子何桂清奏言金陵大營退保鎮江後

探報句容溧陽之賊日漸增多金壇宜興境內
屢遭焚掠常州鎮江二府切近賊氛最爲喫重
丹陽介常鎮之間相去均祇百里且當句容溧
水之衝尤屬咽喉要地臣與和春函商留張國
樑在鎮江布置和春定於二十一日進駐丹陽
居中調度從前大營攻剿喫緊於常鎮軍務不
暇兼顧今近在丹陽各路軍情及防剿事宜應

由和春張國樑統籌督辦隨時具奏其退山兵
勇振旅而行者尙能自立至陸續招集之人需
用鍋帳軍械實難猝辦臣已責成署藩司蔡映
斗等趕緊製造源源解往並飭江南糧臺籌撥
銀十萬兩米一萬石先行委員解濟惟自寇警
以來錢糧釐捐均無指望若不力求撙節決裂
卽在目前臣現已咨會和春嚴飭翼長王浚按

實在收集人數派員點驗酌給銀兩俾濟急需
勿以管帶官日報之數爲憑致滋浮冒其江北
得力兵勇不滿萬人每月需餉十五六萬羅掘
尤難並咨和春轉咨李若珠速將疲弱裁汰和
春張國樑無日不以清釐整頓爲心李若珠王
浚責有攸歸亦斷不敢稍任朦混似此大加節
省或冀勉強支持不至有餉匱兵譁之慮

同日山西道監察御史朱潮奏言杭城失陷由
浙省防範太疏而賊之能長驅直入者以廣德
州不守之故查正月二十六日涇縣旌德失陷
二月初三日廣德州失陷不及十日連失要隘
臣聞周天受貪色好殺物議沸騰近來以爭奪
妓女擅戮都司遂致衆懷忿恨各營解體賊知
有隙可圖連攻數城皆不戰而兵潰誤

國殃民莫此爲甚應請

飭查虛實認真究辦紀律嚴則人心固矣均奏入

上命軍機大臣傳諭和春何桂清曰金陵逆援攻撲長圍衆軍退保鎮江和春進紮丹陽居中調度各路軍情及防剿事宜自應仍責成和春張國樑統籌督辦所有陸續招集之兵勇應需鍋帳軍械等項何桂清已飭令署藩司蔡映斗等趕造解往並籌撥銀米先

行委解現當庫項支絀之時不得不力求撙節著和
春嚴飭王浚按實在收集人數派員點驗酌給口糧
不得以帶兵官虛報爲憑致滋浮冒其老弱兵丁嚴
加裁汰毋許濫竽充數至江北兵勇並著一體清釐
嗣後儘有虛報兵勇名數意圖肥己沾染營中惡習
者別經發覺無論大小將弁必當執法嚴懲不能寬
貸和春等奉命督師日久無功前因退扼鎮江僅予

薄懲未加嚴譴若再不知愧奮力求整頓以圖進取
保全東南大局自問當得何罪耶據御史朱潮奏周
天受貪色好殺物議沸騰近以爭奪妓女擅殺都司
各營解體不戰而兵潰等語周天受現任統兵大員
連次失陷各城是否能勝重任至其平日聲名何如
有無前項劣蹟著和春何桂清密查具奏毋稍徇隱